

頤道堂詩選

頤道堂詩選卷二十一

送內子歸武林

不放錢塘棹於今二十秋
柳邊新畫檻池上舊粧樓
鄉訊催紅鯉閒心羨白鷗
西溪漁舍在花海有扁舟

我去籌瀛舶卿歸奉板輿
晨昏依老屋花木理閒居
葛塢營湖館秦亭起墓廬
他年偕隱處有約伴耕漁

湖上巢居閣孤山隔水湄
倘尋三女墓相近四賢祠
芳草迎油壁繁花勸酒卮
定知勤禮佛無暇更題詩

轉饜關軍國無勞局外爭
還轅應不遠打漿定相迎
顧影波間鷺將雛柳外鶯
蓮花峰畔石更與話三生

西湖餐秀閣詩

內子卜宅武林得湖上片石居在石函橋玉壺水
口小樓數楹卽餐秀閣故址也喜而作詩

湖潒分明秀可餐小紅簾幙翠闌干吹簫樓閣招靈鳳寫
韻軒窗倚采鸞金盞酒香和月飲玉壺雲影浸秋寒全家
都傍西泠住分占林巒作畫看

余眷屬多擬於湖干分宅卜居

花海仙人飲酒歌

內子羽卿辟穀十餘年矣日以越中女兒酒東阿
膠代饗殮錢松壺爲作花海扁舟畫卷因賦此詩
一杯流霞一杯雪扁舟香劃春雲碧雙鬟翠黛雙髻花花
海仙人醉明月仙人家在西溪邊春山嬾抱梅花眠兩三

翠鳥雙白鷺浣花曉弄西溪烟綠萼枝枝手親種花影壓
舩春夢重釀成春酒梅花香勝酌梨花滿春甕飛仙里畔
仙姥墩百花釀酒開清樽不如自釀還自飲閉門醉臥梅
花村廿年辟穀惟耽飲花隱何妨兼酒隱珠簾一半捲東
風落花吹滿遊仙枕宦海蒼茫最苦辛何如酒國有長春
一樽閒話羅浮夢我是花間偕隱人

廬山仙女李騰空詩

父兮仙官女仙女前身都是蓬山主父酣富貴女烟霞笑
謝塵緣志冲舉九疊屏風兩玉人蔡尋真侍郎蔡某女
與騰空同入廬山石
楠花落碧山春太白送內尋廬山女道士李騰空
詩云水春雲母碓風掃石楠花嬋娟自
古多仙骨豈獨天家有玉真

瑟嫺詩來云夢中見李騰空謝余賦詩騰空仙人豈
以余詩爲重耶詩甚清妙爲依來韻和之

我非林和靖安得梅與鶴我非謝幼輿安得邱與壑思求
大藥久駐顏更以筆墨驅雲烟諸妄可破一未盡畫屏坐
對吟雙鬢江左嬋娟數楊李輦下備書甘沒齒君是當年
辛憲英近向詩壇感知已我詩通易卦在頤有勝我者皆
吾師仙人縹緲美人豔瑤精一卷花間詞江山懷古詩千
首紅粉青衫同不朽廬山道士疑是君題詩問訊君知否
乙酉二月望夜夢至丹崖碧水間萬花如繡明月正中
見古仙人飄然有凌雲之氣旁一女子顏色甚麗自稱
唐時廬山道士李騰空仙人爲余師頤道先生詩中表

章之來謝也方欲致詢爲竹風所驚而寤因賦此詩寄
呈先生

太原辛 絲 瑟嫺
女史

亭亭如白雲翩翩若元鶴夢見古仙人空山臥雲壑彼
美人兮玉鍊顏雲裾行動飄秋烟玉咽紅頰出霞表青
蘭香壓雙垂鬟唐時道士廬山李笑口粲然霏玉齒太
白詩中一見君來訪雲君謝知已先生說詩匡解頤風
流儒雅真吾師仙家好名乃過我夢中亦感瓊瑤詞我
得公詩凡幾首名已附公同不朽洞天福地萬花間夢
中曾見斯人否

哭王井叔

驚電追風紙上來渥洼天水出龍媒人疑燕趙悲歌士我

識齊梁綺麗才雙澗白從雲外落萬花紅向雨中開如何
五色江淹筆祇付騷人寫八哀

搔首何從問紫閫飄零身世感紅梁羽摧湘浦啼鸚鵡玉
碎崑山叫鳳凰湖館拊琴秋雨細江城聞籥暮雲涼十年
憔悴青衫淚一寸名心竟未償

隋堤楊柳倦飛絲慘綠才名損少年瘦蹇羸童李昌谷茶
烟禪榻杜樊川春寒玉樹花飛雪夜冷紅橋月化烟惆悵
詩魂招不得尊前反袂祇悽然

轢謝凌顏願未酬遺文鄭重感彌留紅顏少婦開函泣白
髮慈親掩卷愁雲水前生春夢覺海山何處月華遊分明
當作離騷讀落葉蕭蕭夜正秋

山塘新建柳依依祠

依依字靈和廣陵女子年十六適方氏十八而寡
越三載遭乙酉之變被擄拒逼不食而死乾隆乙
巳降乩海門司馬署備叙顛末乞建祠以棲貞魂
二詩六詞語極酸楚道光乙酉吳中好事者爲建
祠山塘清節堂左從其所請附麗當於女祠也余
謂鬼神之事多屬渺茫惟忠臣孝子貞姬烈女則
靈爽所憑確然不易正不必以志乘失載爲疑余
承乏邗上爲史忠正公祠營祀諸忠七十餘人
又建十二烈女祠於郡庠今僑寓吳下聿觀厥成
因爲詩以志之俾與吳宮花草並傳焉隨園詩話

補遺亦載此事並載一絕云歸去虛空踏月行五
銖衣重白雲輕自從飲得銀河水吐向毫端一色
清飄飄有凌雲之氣真仙筆也

山塘春影碧絲絲爭爲招魂唱柳枝蔓草夕陽靈鬼怨梨
花寒食女郎祠和烟和雨前生夢愁葉愁根絕妙詞我是

邢江采風者一尊來與賦新詩

擬別愁根反長愁
枝葉依依詞也

吳中人士爲柳依依建祠山塘小樓三楹塑像甚麗
余謂劉碧鬟亦以示此遂葬虎邱宜祠祀樓中庶笙
鶴簫鶯不虞岑寂也先之以詩

同證真靈慧業來風祠遙對虎山開香魂烈女還貞女麗
句仙才又鬼才月下簫聲借宛轉花間珮影互徘徊雲容

出地蘭翹伴好薦春蘋酌玉杯

小停雲館本事詩爲湘霞作

十樣纖蛾兩鬢鴉瓊瑤顏色蕙蘭芽玉卮瑩質真如玉花
蕊含芳恰勝花雙影玲瓏還解語七情雕刻本無瑕當年
曾話臨川夢一曲新聲感麗華

湖上青山憶舊遊鏡中紅淚易悲秋蘭因絮果三生感玉
怨珠啼一種愁欸欸深情疑雨集迢迢別緒問花樓而今
重攬蘇臺樹惆悵華年逝水流

蕊珠仙子鬱金堂海燕單棲玳瑁梁當日記曾邀史鳳再
來還許嫁文鴛鏡宜春影波秋影花是濃粧月澹粧玉版
烏絲金葉格斷腸集裏返生香

仙館揮毫鞞紫釵停雲知待碧雲來茂漪書愛簪花格道
韞詩推詠絮才白燕筆箱歛畔置紅螺硯匣鏡邊開閒來
妙寫端容畫彷彿寒山見玉臺

采蓮小巷又移居清絕琴園畫不如菡萏香中冰簟冷梧
桐陰裏水窗虛秋聲庭院風來後花影簾櫳月上初閒理
湘絃容並坐一爐香篆半牀書

纖腰楚楚珮珊珊竟許文簫伴采鸞笛譜修來吳調穩笙
囊繡罷越羅單須知綠重情方重不信才難色亦難親與
子京添半臂爲憐玉骨怯春寒

感遇深同焦尾琴譚詩休賦白頭吟種來南國相思樹修
到西天並命禽祇合芳名鑄碧玉可無小像鑄黃金雛鬢

偶向花前顧莫誤輕紅抱錦衾

嬋娟知已是鷗波早洗鉛華謝綺羅秋菊春蘭俱秀絕嬌
鸞嬾鳳奈情何蔣家小妹青溪近代國名姝玉色多休學
尹邢長避面散花同伴病維摩

羅浮花鳳歌爲湘霞作

白羽冠距背純赤色大如鸚鵡產羅浮山中

千樹梅花萬胡蝶春烟翠染屏風疊更有仙山小鳳風花
首臺高掠雲葉翩翩素練花間翔萬橫香雪深女床飢啄
梅英渴梅露雪羽冷帶梅花香玉笙吹散春陰重輕盈略
似桐花鳳小影居然萼綠華前身應在朱明洞添種寒香
滿翠微瓊宮玉女羽爲衣夢回四百峰頭月惆悵窗前白

燕飛

飛卿畫紅牡丹爲湘霞小影因題四首

絳雲樓閣起沈香絕似秦臺下鳳凰解佩情多貽綬帶賜
緋絲重想衣裳搗來深染仙人藥簪處濃添玉女粧同受
東皇春雨露一枝紅榷伴扶桑

萬綠爭扶一品紅美人微醉倚東風豔分魏紫姚黃外春
聚天香國色中織到錦機雲宛轉換來霞帔月玲瓏合歡
扇似團圞鏡多買燕支謝畫工

絳紗弟子擁詩壇七尺珊瑚帶笑看玉局春圍新步障碧
城人倚舊闌干丁簾影細嬌飛燕甲帳香濃貯采鸞誰似
瓊臺老詞客解將紅玉品珠盤

荔支羅帕石榴裙金鴨微溫可待熏別起畫樓移絳樹儘
勞彩筆寄朝雲色香自合稱雙絕富貴何妨到十分終踐
碧瀾堂畔約春愁消盡杜司勛

琴園春閨限韻

柳枝更柳枝桃葉復桃葉一唱崔鴛鴦再唱謝胡蝶輕軀
漢殿仙細腰楚宮妾采桑驚羅敷讀詩慕班婕曲巷訪青
楊畫橋尋皂莢小院掩流蘇長廊迴步屐雪香庭苑飄珠
露池塘裏斗帳櫻桃垂鏡檻芙蓉疊眉畫翠雙鸞脂染紅
一捻百花綺袖紋六幅羅裙褶長哦理纖髻淺笑開嬌靨
韻寫采鸞箋書仿來禽帖瑤琴待月彈玉笛臨風摩問字
捧香奩貽書珍翠篋楚玉連理佩湘筠合歡筵宛轉回文

詩珍重坤靈牒同心眷彼姝含光對佳俠禮防跬步持神
恬夢魂愜迎以七香車載之雙畫楫千春樂未央新詩滿
雲笈

芙蓉湖詞

翠黛舞殘靄明鏡澄孤霞我來芙蓉湖不見芙蓉花
疎星遠若空微風吹復歇不見芙蓉花且玩芙蓉月
笛婢憶紅橋船孃話黃浦一櫂芙蓉烟兩槳芙蓉雨
輕盈洛水鴻縹緲秦臺鳳憶爾芙蓉仙還作芙蓉夢

五州山櫻桃澗上訪陸隱君故居

綠波倒影春陰冑萬樹櫻桃紅一澗澗上山人舊草堂門
前澗水流花片山人者誰陸隱君野鶴舊與山猿羣穿雲

踏雪採山果供養隱君如養親二月櫻桃開三月櫻桃結
山人招猿嚼紅雪飽食不須愁內熟猿兒引臂猿女騰攀
枝亂拘隣家藤山人與猿署山券日食無過紅二升山人
去已百年久林樹至今猿共守峨眉老猿伴竺公兩猿相
見應相友澗上花開胡蝶飛山家幾處竹間扉待攜蠻榼
漁磯上靜聽林鶯玩翠微

江上見白鷺

鷺君吾好友江上見孤飛水鏡澄清曉山屏點翠微農家
青箬笠漁父綠蓑衣我亦忘機客西冷有釣磯

新河柳色

伊婁河一曲新柳已成行細雨依依重微風嫋嫋長江橋

迴鴨綠水郭影鵝黃何似桓宣武攀條泣夕陽

樗園古春堂壁間懸詩字數幀甚奇偉欵署青霓相
傳仙人鸞筆也異而賦之

問君家住幾重天紫極宮庭碧落緣黃鶴榴皮書自好采
鸞花葉韻初傳高吟李杜韓蘇外縱筆歐虞褚薛前我亦
瑤清舊儔侶親將鳳管寫霞箋

文選樓夜集聽家受笙話闕隴之遊並題其松籟閣
詩集

聽爾高談酒座圓繩行沙歷徧金天一雙元鶴空同上三
五明星華嶽前關塞舊遊遙入夢漢唐往事遠如烟文章
要得江山助此集應知五百年

奉答雲臺師見題拙集之作

門前桃李卽甘棠春到恩門蔭倍長
下榻真同漢徐孺登堂曾拜宋歐陽
武林山下三生石文選樓頭一瓣香
珍重

義田仁者粟又勞雨露潤江鄉

江都儀徵兩邑水災公州義田積穀以賑全活甚衆

雲臺師見題拙集原詩叙云君宰江都多惠政開伊婁

河建彩虹橋以便民又監浚儀徵運河癸未夏江水爲

災拯卹更力頌聲遠聞旋丁外艱去官與余乙丑年在

浙賑災丁憂相似也偶閱其集中過文選樓詩有我是

春風舊桃李種花還得傍門牆之句續成一律題之

種花還得傍門牆滿縣春風憶故鄉
埭駕一橋通召伯

水通兩邑勝河陽拊災似我昔巡浙奉諱如君今去揚

江北部民畱不住門前桃李卽甘棠

題伊墨卿畱春草堂詩集

蔡襄箋荔譜陸羽注茶經俊逸多風味幽芳出性靈懷知
類屬草思舊欲書銘太息虹橋路秋蘋滿碧汀

清明淮浦阻雪

萬樹隋隄柳春風感歲華醉聽淮浦雪夢憶廣陵花翠被
中流舫銀燈昨夜槎黃河方轉漕心事悵啼鴉

天妃牖觀糧艘渡河呈寄圃相國

渾流南下挾奔濤輓運纔過第幾艘歎我觀河先面皴有
人籌國正心勞蓬萊清淺麻姑髻桐柏宮庭玉女繚闌
道至尊容海運長安天遠五雲高

袁浦感舊

名場跌宕儘蒼涼宦海升沉更渺茫杜牧曾依牛節度常

何肯薦馬賓王二公祠畔東西廡百尺樓頭上下牀今日

袁江重感舊脊令風雨最難忘

謂戴可亭相國鐵梅菴宮保徐心如河帥結語謂家

生

橐筆蓮花幕府開當年宗袞有英才中河路避黃流險清

水潭澄碧浪迴夜月帆檣天后廟春燈簫鼓禹王臺遺書

讀竟還搔首新爲元龍作傳來

家天一先生佐靳文襄治河功甚多其尤者築清水

潭開中河也余方爲先生作傳故未句及之

五雲天際是長安三峽洪流阻急湍問道

至尊籌海運久勞宰相駐河干盤根錯節談何易輓粟飛

芻事本難十五年。前成議在。又煩公等互傳看。嘉慶十五年余應

詔言海運可行。中丞章公作駁議。今春二月予在浦上有旨議行。羣公索觀舊作。因作續議上之。

雲梯關下暮潮痕。重向烟波一問津。細雨尚滋芳草路。東

風全換綠楊春。白衣縱酒多奇士。翠袖傳花有美人。蠟

樓頭觴月地。宵來依舊涌冰輪。蠟樓余二十年前舊處

虹橋舟中書寄友人

洛下名園一棹過。漁洋禊事問如何。麴塵輕染鴉黃柳。萍漲微添鴨綠波。商女曲中明月上。宮人斜畔落花多。罪言原衛勞重問。惆悵樊川鬢已皤。

六合訪唐張果手植梅

園客當年種春風。一樹梅花仍含綠。萼根已偃蒼苔。顧影

青禽去尋香白蝠來仙莊何處是王屋暮雲開

石城雨泊書寄湘姬

暝色暗高樓高城古石頭夜船連雨泊春澗帶花流短夢
迴孤枕殘更下幾籌憐君長臥病江上憶歸舟

青溪水榭晚坐

暝烟初上綠窗紗何處高樓噪晚鴉淺碧微波初漲水澹
黃新月半簾花夢回江海詩懷舊春到湖山客憶家兩鬢
羈愁消不得篷床禪榻送年華

金陵節院懷鐵梅菴宮保

淋漓殘墨峴山碑東閣梅花感舊枝海內聲華推軾轍禁
中科第重郊祁曾叨皇甫三都序親校歐陽一卷詩西域

風霜東海月 羊曇雙髻亦成絲

江左騷壇說二陳 婁東詩派匹吳筠 筠依劉蹤跡 經年久薦
福文章 一表新知已最深 韓太尉學書曾拜衛夫人 匣中

幅幅吳綾在 嘯樹簪花總絕倫

宮保與如亭夫人皆善書

余侶梅

文樞

以宋搨蘭陵公主碑就趙晉齋易馬湘

蘭牙印乞詩

白練褰低翠袖長 紅牙小印指痕香 南朝賸粉春人影 我
識金陵馬四娘

一卷蘭陵公主碑 居然駿骨換蛾眉 沉吟小幅湘花影 留
伴秦淮五字詩

梅嶼寒香未可攀 西湖社集此雲鬟 一方紅沫曾親見 記

取浮生半日閒

余曾見何雪漁爲蒲蘭製青川石浮生半日閒五字小印王子穀日西湖社集所作

秣陵城南晚步

細草鋪茵柳脫絛長干春色晚晴天夕陽挂樹前朝寺流水飄花別浦船浮白一尊寒昨夜踏青雙屐冷經年野棠如雪鶻啼急回首西泠憶墓田

秦淮水榭歌

明月南朝花北里千秋艷跡秦淮水一灣金粉女兒家玲瓏水榭家家起水榭臨流閣曉寒絲絲烟雨濕紅闌桃根桃葉嬌如許都作桃花小影看桃花照影春波綠簾波低亞瀟湘竹流黃枕簟避人窺霧縠水綃隱紅玉最好臨波泥晚涼嬌鬟媿婿掠殘粧一奩水滴薔薇露四壁花開菜

荊香筵聲清遠簫聲細幾輩嬋娟說佳麗澹粉輕烟抱恨
人假紅倚翠銷魂地殘夜烏啼夢未消垂楊垂柳舞纖腰
不堪嗚咽秦淮水惆悵青溪舊板橋

美人勸酒

迢迢鴛鴦飄飄胡蝶美人桃根復桃葉一徑蒼苔隨步履
飛花紅入金叵羅雙鬢勸酒爲我歌春江迴風吹綠波花
前微醉朱顏酡晚霞銜山奈樂何

飄飄胡蝶迢迢鴛鴦美人對花空斷腸花前爲我勸一觴
花影迷離生兩壁西下夕陽東上月相逢飲酒不盡歡鏡
裏青絲欲成雪人生何事輕離別

紫釵樓題壁

青楊小巷晚啼鴉，皂莢橋邊第幾家。
秋士羈愁雙鬢雪，春人殘夢兩鬟花。
聽箏別館燈初灺，鼓瑟離堂月易斜。
不待長亭歌折柳，尊前無語卽天涯。

題秦淮酒家壁卽以畱別

幾番繫纜石城橋，紅粉青衫話六朝。
桃葉畫船春載酒，梅花禪榻夜吹簫。
鷗邊逝跡悽流水，雁外歸心逐暮潮。
一篋離聲雙櫂夢，烟波漠漠路迢迢。

新林浦阻風寄友人用太白韻

好風不易得，若與故人期。
前日渡江來，獨獨船尾吹。
六朝好山色，一旦慰離思。
春氣知已深，草長謝家池。
昔別廣陵郭，梅花白滿枝。
今別秣陵城，楊柳垂綠絲。
盈虛亦常理，欣

不問蓬萊詩選卷二十一
十三
戚嗟隨時既知適意快暫阻奚獨悲謝朓題詩後還吟李
白詩

燕子磯閒眺

鱗鱗淺渚濛平沙估客停橈小市斜江燕初來逢細雨河
豚欲上有桃花青林白石山樵路翠壁紅闌野衲家閒向
觀音門下望順風帆好送歸鴉

穀雨日渡江

穀雨初晴風力微白門柳色送依依鄰舟借問梅根冶江
水初生燕子磯孤坐自拚浮白醉名園幾處牡丹肥封姨
似識羈人苦相送征帆一葉飛

句曲禮茅君並訪陶貞白隱居

地肺通句曲華陽古洞天祖孫皆得道兄弟各成仙玉殿
留雲氣金庭隱翠烟何年鸞鶴降來候此峰巔

亦有陶貞白棲元在此中畫牛心自遠銘鶴體偏工宰相
辭梁武神仙慕葛洪吹笙高閣上何處不松風

京口阻淺改道江行

何從寶晉問高齋魚尾租船雁齒排江上客程丁卯埭
中詩卷癸辛街帆檣楚蜀通纔好樓閣金焦望亦佳回首
秣陵青不斷昨宵殘夢落清淮

澄江道中

聞道澄江好澄江碧水澄曉烟林過雨宵影月流冰老圃
黃千點若山翠一棧人家最閒適多向曲闌憑

延陵季子墓

遜國尋常事非因避闔閭一坏君子墓十字聖人書挂劍
無遺樹歸耕有舊廬清風同采藥相望白雲疎

香山采香徑相傳吳王美人采香於此

樂府唱吳趨游觀徧五湖相傳攜翠黛於此采薜蘿古澗
留香草空林噪夜鳥西施好顏色曾共錦帆無

君山

聲望原嘗亞功名種蠡分楚宮曾賜采吳地最憐君遠浦
秋深雨叢祠日暮雲卽今青嶂裏人說有遺墳

顧山寺昭明讀書樓

帝子文章美遺蹤到處留卽今顧山寺亦有讀書樓梵宇

誰新建臺城我舊游山茶花一樹開落自千秋

樓前山茶一株如博

為昭明手植

小停雲榭贈秦淮女郎吳美香

新聲絕似董嬌嬈低按紅牙譜綠腰趙國才人工鼓瑟巫

山女子善吹簫寄書芳草尋深巷問訊垂楊話板橋我是

江南舊詞客簪花曾見縮垂髻

答齊梅麓見題拙集之作即用原韻

琴心三疊蕊珠篇絕世才華妙騁妍文苑新編六朝賦皇

文頴載君進呈賦十篇渾儀閒鑄九重天君精推步所鑄天毬西士歎服寒凝霄露

銅仙掌韻裏湘雲玉女絃更憶東坡老居士眉山家學付

斜川謂尊甫雨峯先生

一麾惆悵別瑤京十載江城憶禁城綠樹萬家春艤棹白
華滿谷曉吹笙天都雲樹還鄉夢陽羨溪山避世情門外
雙流環碧玉草堂又報著書成

君家黃山近卜
居陽羨養母

長風萬里送行舟太息何人肯掉頭祇爲漕河籌兩濟敢
云著錄重千秋酒邊夜雨頻移燭鏡裏秋霜各倚樓我是
當年狂李白也從海客話瀛洲

君與余同議海運余
銷瀛洲海客印贈君

三竺雲山九里松種魚興爲放鷗濃卜鄰暫許招裴迨把
臂還欣識李邕詩寄月林橫澗笛夢回烟寺渡湖鐘幾生
脩到梅花好歸去躬耕學臥龍

原作

發源

齊彥槐 梅麓

遊仙樂府冶春篇翡翠蘭苕遜此妍四海笙歌無事日

六朝花月有情天，秋霜可奈三千丈。錦瑟何因五十絃，
並學離騷託香草。玉溪風格勝樊川。

芙蓉豔豔滿瑤京，十二重樓接五城。洛浦神人爭解佩，
緱山仙子爲吹笙。綠波春水非文字，紅雨桃花有性情。
吟到一篇吳祭酒，江關愁煞庾蘭成。

西冷烟雨蕩扁舟，仙侶宜居葛嶺頭。好水好山堪一世，

佳兒佳婦總千秋。

令嗣小雲子婦允莊皆有著作

小青湖上新修墓，太

白江干待起樓，好事被人嘲未了。酒酣還要說滄洲。

君爲

小青修墓孤山又擬于江上建太白樓近復與余壽議海運故及之

漫誇秋菊與春松，貧女梳粧不解濃。搔癢豈能供杜牧，

嗜痴何意遇劉邕。愁深故國霜前雁，夢醒寒山夜半鐘。

羨煞碧城詩弟子買絲爭欲繡元龍

君女弟子極盛如大原辛瑟卿金壇

吳飛卿于蕊生史琴仙祁門張鳳卿蒙城張雲裳白門孫美裳陳友菊吳門曹小琴吳飛容錢遺絲黃蘭卿燕卿梁溪華芸卿粵東黃耕曉錢塘汪逸珠顧螺峰吳蕙香陳妙雲皆執贄門下稱碧城弟子

赤陵女子琵琶歌

喀爾喀得赤陵女子色妖豔工琵琶呼爲赤陵姐

寵冠一國噶爾丹豔之興師滅其國奪赤陵姐

聖祖親征討平之以赤陵姐無歸暫留理藩院後爲喀爾

喀置君乃遣之歸國琴河徐芝仙有詩紀事因和

此篇

風急陰山驅萬馬銅絃響急流珠瀉絕域關山絕代人一曲琵琶赤陵姐從古佳人出北方錦鞬寶袜豔紅粧三千

毳幕迎油壁十五葦庭占洞房戎王牙帳伊吾外甘松市
畫嶽蘭界興和山下舊龍庭遠跨金河橫玉塞穹廬暮暮
復朝朝醉擁華髮奏綠腰自愛燕支嬌北地不知金粉豔
南朝玉關楊柳芳春色飛花飛絮逢寒食鞞髻香盤戈壁
雲濃粧豔照天山雪那知兵燹起無端窺伺強鄰噶爾丹
巧奪桃花歸玉帳強扶柳葉上金鞍白翎阿鵲翻宮徵蠻
觸兵戈交未已一樣柔然入畫人不成忠順三娘子國中
牛馬向南眠正是

仁皇御極年但返青蛾誓白馬

天恩原許赦窮邊風雨憑陵黑山北脩羅兵仗龜茲國須
知天意眷中華要令王會開西域六師三度遠籌邊戊校

辰旗帳殿圓塞外羽書飛瀚海回中烽火照甘泉天中節
近蒲觴御

翠華親駐香泉戍兩道將軍十萬師擒渠夜踏龍城路贊

普倉皇棄國逃可敦臨陣亦香消盤龍細鎧餘殘片么鳳

文綦賸斷絳喲爾丹之妻名阿弩曷吞徐詩所云羽林年

飛週身鈿鎧少爲余言親見閻氏陣前仆四寸文綦么鳳

秋金鏤是也掃穴犁庭等閒事辛苦蛾眉竟生致塞月遙

隨細馬來邊雲遠逐香車至邊雲塞月總愁烟鈿袖檀槽

祇自憐兩國銷亡空白骨一身飄泊感紅顏經年歸去辭

金殿版籍新編理藩院果然紅玉暈朝霞郎官典屬曾親

見遠送琵琶出國門鳳城雲樹黯銷魂親將萬里思歸引

譜出

天家曠代恩，鏤金雙鳳蹙。紅牙一曲遶，邏一曲花可憐香。
種猗盧族何處仙，根幹擣家曲終還。抱琵琶去兩行紅柳，
天涯樹帶得。

中朝雨露歸四條絃，上春無數有客龍荒繫。筆回蒲桃酒，
熱賦詩來胡笳添。寫昭君怨，別有人間大忽雷。

洞庭攬勝畫冊詩

太湖三萬六千頃，中峙兩山袤廣各數十里。居民
數萬戶，在湖淥山翠中，洵海內之洞天福地也。葉
甥調生世居東山白沙村，寄居昌亭者三十餘年
矣。每憶舊山輒爲神往，因屬改君七香合東西兩
山名勝圖之，乞爲題詩。

碧螺峯

產佳茗曰碧螺春色香俱絕殺雨前採以入貢

山晚碧痕深山曉螺痕淺數重蒼翠中早春有佳筍回首憶龍泓九溪隔雲嶽

翠峯寺

寺在山前翠峯鳴有龍藏閣藏經甚多方丈中薰香光書額曰雪竇天衣古道場寺

門看楓葉最佳

古寺翠微深雲嵐明幾疊天衣古道場龍藏閣雲笈何年尋石經來看紅楓葉

莫釐將軍墓

將軍相傳隋時人隱居此山莫釐峯以此得名墓在山中不可考矣

山以將軍名不見將軍墓韓賀平陳業今亦不知處夜深明月來猶挂隋朝樹

柳毅井

井在橋社卽龍女寄書處

儀鳳舊書生龍宮弄杯聲風鬟霧鬢人明粧定嬌姪女兒
歌橘枝誰是傳書者

壑舟園

明少傅王文恪公兄滌之先生隱居處有天繪閣雲津堂縹緲樓諸勝

夜半壑藏舟誰解負而走相公植三槐先生種五柳青山
與黃扉各自名不朽

朱氏十二樓

前代富民朱某家多姬妾各居一樓每出遊薄暮歸則諸姬登樓張燈奏

樂迎之梅村集中有詩

美人豔羅綺豪家縱歌舞何處十二樓玉顏已黃土一篇
祭酒詩青山與終古

葑山

亦名龍頭山爲東山觀荷最勝處

葑山恰無葑頗多紅荷花風裳與水佩香氣凌朝霞月中

聞櫂歌采蓮雙吳娃

東園

山中席氏別墅也

翠華小駐今爲民居矣

園近東山麓東山此舊家春風到庭樹無復昔時花野老
園前過猶能說

翠華

豐圻

依山臨湖梅花最盛
一白數里若香雪海

此地梅花國青山好結廬四圍香雪海一角美人湖昨與
琴僧約還尋古雪居

古雪居在翠峯鵝深處
有枕流閣巖壑絕勝

具區風月橋

東山之旁有小山曰西金山木兩山
也此橋連屬之不知何年所建亦名

聯璧
橋

兩山橫一橋彷彿彩虹落估帆暮歸來每從橋下泊風月

良復佳篷窗伴清酌

石澗泉

在漁灣泉不甚深汲之不竭醱酒最佳汚之徙去祈禱復還稱靈跡焉

在山泉水清泉石窞若曰甘芳復清冷山家解醱酒喚作

洞庭春花前飲一斗

白沙村

調生故居在焉產枇杷甚美大女華姬知余者此爲植枇杷一林歲以供余余爲題

所居曰盧橘巷

白沙村上路堵鄉深復深嬌女此偕隱手植枇杷林簪花
數行字青李寫來禽

縹緲峯

西山最高處登之可望數州烟雲浮翠若縹緲焉

西山最高處縹緲一峯孤彷彿浮雲影隨風過太湖烟波

三萬頃涼翠滿菰蒲

林屋洞

有黃帝藏書龍威丈人守之夏禹得
以治水相傳洞中有路可通岳陽

杳杳林間屋蒼蒼屋外林洞中隔凡處隔斷洞庭深欲借
素書讀龍威不可尋

用里村

用里先生
隱居處

用里先生宅當年在北山山深林更密幽寂勝商顏我亦
茹芝客長吟山水間

杜蘭香宅

仙女杜蘭香見壩城集仙錄吳建興二
年降包山張碩家有侍婢二曰松枝萱

枝爲詩
贈碩

洞庭漁父女云是杜蘭香此地畱仙跡靈顏話夕陽花宮

何日建吾欲禮明璫

余謂山中當建
一祠以存仙跡

毛公壇

漢劉根得仙處體生綠
毛故世以毛公稱之

劉根昔好道辟穀但餐松深林聊宴息夜靜月華空何似
秦毛女華山石室中

蔡經宅

王方平過蔡經家遣人邀
麻姑姑至擲米成丹砂

方平盛儀衛麻姑美容鬢鳥爪纖可搔明珠圓自轉於今
幾人世蓬萊更清淺

包山寺

寺有唐會昌中
陀羅尼經石幢

寺門開翠微古殿松杉冷一卷陀羅尼梵字書佛頂春雨
洗苔花立盡斜陽影

鮑靚故居

晉鮑靚隱居於此卽葛洪婦鮑姑之父
也故亦名鮑山今稱包山或是鮑山之

訛

鮑公昔隱居空山靜如許包山寶鮑山遺宅渺烟雨爲問

葛洪婦何如梅福女

石公山

山有玲瓏石壁陡插湖中其上爲歸雲洞聯雲嶂多奇石宋良嶽慶雲萬態奇峯卽

嶂前石也旁有

小峯曰石姥

深洞臨湖濱雲歸猶帶雨其旁聯雲嶂奇峯墮塵土山靈

伉儷深石公語石姥

銷夏灣

多荷花吳王嘗與西施採蓮於此

荷花紅一灣吳王此銷夏西施顏更嬌一顧荷花謝我欲

放扁舟夜泊荷花下

明月灣

相傳爲吳王玩月之處

吳宮舊明月曾解照西施西施一以去宮殿賸荒基有客

灣頭泊沉吟月上遲

大小龍渚

巖石覆水上如蓋水落時漁舟往往掉入巖下有巨石撐立水中疑卽逸書所

云金庭玉柱也

竒石若垂雲大小兩龍渚有時龍乘雲去作天下雨我來
讀道書金庭訪玉柱

讀李杜集書後

李詩如飛龍杜詩如香象香象蹴踏莫敢當飛龍變化難
名狀李詩如老鶴杜詩如竒鷹老鶴瘦羽橫八表竒鷹健
翻摩千層李詩靜杜詩動李詩輕杜詩重靜如雲霞舒卷
遊虛空動如江海波濤生頽洞輕如落花飛絮飄迴風重
如竒峰疊嶂森長隴李詩謹嚴杜豪縱消息微茫誰解誦
長歌洗兵馬三復蜀道難沉香亭上託諷諫杜鵑聲裏摧

心肝學到兩公詩境盡品到兩公詩論定萬丈光芒雙管
斲李是詩仙杜詩聖畫舸錦袍空山麻鞋寒瘦飯顆飄零
酒杯李詩離騷杜變雅我讀公詩淚盈把茫茫萬古誰知
者

綠綺樓聽吳門女郎歡歡彈琴

名花傾國兩相歡生澀冰絃玉手彈長慶集中蘇簡簡善
和坊裏李端端十眉翠畫春楊柳雙鬢紅簪露牡丹略解
琴心渾未透湘雲鼓罷倚闌干

鍾吾山懷赤松子

鍾吾山一名穹窿山相傳是赤松子採藥處

一角鍾吾翠幽巖深薜蘿曾聞赤松子採藥此山阿蓋影

停雲古濤聲醒夢多祇應辟穀者遊跡一相過

女弟子錢蓮因爲余畫梅花鐙屏賦此誌謝

玉局仙人宅金釵弟子行全身喜神譜半面壽陽粧摩篋
雲深碧吹笙月澹黃羅浮雙鳳子花海解尋香

丹青楊妹子翰墨管夫人樂府傳芳樹深宮憶采蘋曼香
銅井曉翠羽玉臺春明月三生石前身與後身

我是維摩詰君真萼綠華雪明香海樹春暗月林花照影
窺銀燭籠烟護碧紗祇應林處士解爲賦橫斜

百花墳歌

前明南海名姬張喬夢海神聘爲婦越三日卒葬
之白雲梅坳粵中詩人各於墳前種花一樹名曰

百花墳顧君渚香書來乞詩爲賦一首

羅浮胡蝶飛彩霞美人墳上開百花花光都作美人艷
壓倒南漢宮人斜水精宮闕嬌歌舞霧鬢風鬟渺何許
層樓深貯如花人羞煞珊瑚萬龍女埋香瘞玉梅花均
白雲縹緲如輕綃凍蛟寒立彩鸞下五銖衣薄風飄飄
一樹名花詩一首寒食年年一杯酒問到穠芳憶玉顏
萬花無語都低首小青香塚柳娘墳幾處香泥葬畫裙
極目南天最愁絕招魂豈獨爲朝雲

題劉松年彭祖觀井圖

神仙我愛彭錢好妙旨精微得黃老天上仙多官不少
不苦官多苦官小不如人世且自了四十九妻顏孰姣五十

四子身孰保孰是仙兒孰仙媪幾處春山多宿草守藏之
吏若守寶柱下之史供蒐討上士異牀息深窅玉液灌田
髓補腦八百八齡顏不槁平地何嘗異蓬島茲圖應出天
水趙畫院才人運纖爪車輪覆井若栲栳更以絲繩隨樹
繞俯祝憂心疑悄悄示戒分明足毋躋我生慕仙在襟抱
追逐瑤韶步晨肇綏山桃實安期棗未得清涼滌煩惱昔
行曾過彭城道舊宅依然隔林杪無波古井澄寒沼落葉
銀床紅不掃家有敝廬鄰葛鮑丹井分甘汲清曉何事紅
塵長擾擾仰視碧天雲縹緲嗚呼學仙胡不早

爲俞秋圃刊琵琶譜感賦

縷金雙鳳蹙紅牙解聽新聲泥酒家留得南朝遺響在隔

江猶唱後庭花

陳隋調卽玉樹後庭花君獨得不傳之秘

一曲新聲酒一杯香菱閣畔月華閒善才弟子人如玉曾

聽花間小忽雷

雲間女士姜西梅君琵琶弟子也

吳娘水閣韻泠泠桃葉春潮畫舫停愁絕江南冶游客夕

陽簫鼓幾回聽

夕陽簫鼓琵琶曲名

撥絃轉軸寫溫存金屑檀槽記夢痕我是青衫舊司馬尊

前惆悵最銷魂

霓裳殘譜託知音玉樹堂前燭影深讀到海情舊題句愴

懷何止感人琴

君錄同人贈詩爲海情集

分明胡馬度陰山彷彿文姬入漢關此是當年廣陵散肯

令遺響絕人間

君病中貽書以茲譜相託

題丁龍泓硯林詩集

秦漢羅碑版商周證鼎彝誰從六書外得此一編詩幽壑
露竒石古梅橫瘦枝何年營憩館殘墨滌深池

題金壽門冬心先生集

當年壽道士詩卷抱冬心明月在天地空山自古今翠深
松樹崦香遠梅花林彷彿朱絃瑟瑟寥寥雲外音

微波榭銷夏限韻

高樹嫩涼舒清池微暑歛小坐宜小園畫閣如畫艦簾櫳
亞花檻闌干圍竹檻沉沉淺碧紗脉脉流黃篔簹帳麝膾
懸綃帳流蘇掩素馨雪皚皚幽蘭香冉冉神恬蜨夢酣膾
小花魂麗荷蓋雨欲來蕉扇風微颭鉤響玉聲疑枕痕紅

印儼菱波漾洄洄蘭湯浮澌澌沃雪艷恐消浣花香不減
嫩摘雉尾蕤軟剝鷄頭芡銅鑲屈戌閒金盆織甲染琴絲
玉軫調箏譜瑤箱檢風高露下徐月華雲吐漸聲試秋蟲
驕影息涼螢閃微吟思纏綿小飲意荏苒秋感桐樹心淚
攔桃花臉鼻鼎漸成灰羊燈欲無燄斗轉界斜河夜星明
一點

海運感事詩

有序

余於嘉慶庚午攝常熟令

詔以河運阻滯飭議海運會主可行之說撰爲海運議上
之中丞章公憎余妄言擲所議不閱今年春至袁
浦會高堰潰決黃流阻運復以此議言之觀察梁

公蒞林深以爲善並言之相國孫公制府魏公亦均以爲可通奉

明詔議行魏公欲行之意甚摯而掣肘者衆乃不果余尋南歸方伯長沙賀公耦耕當世大君子也盱衡事勢慮來年河運未能復舊關係

天庾者甚重海運舊無章程舉行或多支絀以余留意此事垂二十年屬爲具草余以齊梅麓大令施樸齋孝廉謝寄梅韓錦堂兩止舍咸究心於此言之方伯請以爲助並爲齊君假館於敝居之西晨夕考究三月之久酌爲應行事宜六十條頗稱賅備以冒昧付梓爲忌者藉口要津側目乃亟毀所梓

諸君亦各散去是年冬遂行海運章程與拙議互
有異同以局外不復過問矣惟方伯與觀察公忠
體

國虛懷受善不愧古大臣之風而諸君數月共事各懷
忠義激發之忱拳拳於中未能忘也作爲此詩以
贈諸君並呈方伯觀察亦使後之人有所考焉

皇畿形勝撫全燕析木丁沽勢更便西北田疇方度地東
南琛賚久朝

天潞河鱗屋千倉米遼海雲帆萬里船檢點圖經答

明詔記曾籌筆十年前

一夕西風起海門萬家烟樹付鯨吞頓令高堰長隄缺終

見清淮駭浪奔，舳舻乘風爭識路。
舳舻利涉久承恩，扶桑捧日葵傾日，各有心肝奉

至尊

其勵丹忱答

九重徹桑心，與徒薪同媿。無經濟瓊山後，敢望文章玉海

中。

方伯屢以余文入皇朝經世文編

放眼欲窮天，浩渺縱談如泛海。空濛

尙餘破浪雄心在，便擬凌虛一御風。

殷勤籌策佐儲胥，各抱愚忠藉此舒。豈意人情幻荃蕙，終令公等狎菰蒲。烟雲故紙三升墨，風雨陰符一卷書。從古功名要遭際，不須更與論河渠。

琴園月夜聽湘霞彈琴

鏡池水浸流雲白一樹青桐畫秋碧桐陰深處華月來照
見晚花清似雪雙鬟矮媿花滿肩水綃霧縠飄輕烟秋紅
滿階珠露濕晚涼爲我彈冰弦一彈簾外秋風生再彈空
際秋河明三彈四彈皆秋聲暗蟲切切棲烏驚含睇宜笑
招湘娥新聲自譜嬌梨渦故山招隱紛女蘿漁歌彈罷彈
樵歌珠斗闌干影斜樹玉軫停揮拂毫素流水高山一片
心收拾琴囊話琴趣

題花月舫

古雲製畫舫極雲牕霧閣之妙舊未有名余自吳
門假歸武林題曰花月舫並系以詩

牙檣錦纜麗無雙繡幕房櫳綠綺牕曉枕看山開玉鏡晚

簾聽雨掩銀缸梨渦兩曆催行酒桃葉雙鬟唱渡江好傍
烟波載花月爲君題向木蘭艖

湘鬟水榭題壁

青鳥啣花金井闌美人粧罷捲簾看蒲桃葉小芹芽短羅
袂隔煙生嫩寒

明月吹簫樓

元女士曹妙清字比玉錢塘人能詩工書畫師事
楊鍊厓鍊厓爲作詩序書史會要載其居在湖灣
和鍊厓詩云美人絕似董嬌嬈家在南山第一橋
不肯隨人過湖去月明夜夜自吹簫朱青湖徵君
訪其遺址思建明月吹簫樓爲湖山增一韻事而

力未逮余因詩之以待好事者繼志焉湖灣當與
今夾字港相近

蘋花香冷湖陰碧
哀蛩啼老秋娘宅
彩雲散盡玉簫孤
殘月淒涼夜深白
翠袖天寒隱薜蘿
西冷寒女說曹娥
沈吟第一橋邊路
月落烏啼水不波
海棠石壁題花蕊
玉帶袍硯名凝硯池水錢塘三絕畫書詩竹枝價重西湖紙尋秋
幾度泊蘭橈
誰築紅樓傍
畫橋呼起香魂
湖水上月明
夜自吹簫

小青曲孤山弔小青墓作

小青名元元廣陵馮氏女錢塘馮具區子雲將妾
能詩善畫爲大婦所不容屏之孤山別墅諷其去

小青不可鬱鬱以終蓋志節女子也詩稿爲大婦
所焚僅存十餘篇後人爲刻焚餘草事見支小白
馮猶龍所撰小傳及施愚山夔齋詩話錢牧齋列
朝詩人小傳以爲無其人者謬也

情天小劫罡風起片片飛花紅著水零膏冷翠盡成煙美人甘爲傷心死傷心妾命薄於花碧玉何嘗是小家佛肯
慈悲仙愛惜前身應是婉凌華妬婦津頭風又雨倉庚難
療胭脂虎那知妾不羨鴛鴦啼聲信語知何苦遠篴哀秋
帶雨聽斷腸一卷牡丹亭白花紫玉悲前世絮果蘭因證
此生花開雪滿湖西路一杯自酌蘇娘墓閣門深鎖綠陰
床知是他年埋玉處冷服明粧玉樣溫碧天人遠澹無痕

畫師可有傳神手寫出亭亭倩女魂鏡湖紅瘦芳魂醒檀
炷香銷梨汁冷淒涼自弔畫中人夕陽一片桃花影如此
蛾眉最可憐西冷芳草葬嬋娟姻緣領略人間世莫乞他
生並蒂蓮

孤山葬菊香墓

諸九鼎菊香墓誌云菊香者不知何氏婢女也死
葬孤山林處士墓側聞諸故老傳自宋時生前吟
詠慕和靖之爲人沒後英靈結梅花之伴侶徐電
發本事詩注王西樵十笏草堂集注圃尺牘皆載
之

林家梅鶴外曾有菊香墳苔色凝朝露松陰澹暮雲落英

嬌翠袖輕澱漾羅裙莫恨青衣賦青衣自不羣

以蒙泉外史山水畫幀易得楊雲友小像詩以誌事

雲友小像舊藏瓶花齋吳氏不著作者姓名有聞

子將題云梅花數點石欹斜料峭新寒約鬢鴉愛

住暗香疎影裏一生應不識烏紗有叢睦汪氏小

圓印蓋春星堂舊物也

一奩小影識楊娃知出曾家與謝家

曾波臣謝文侯均爲雲友寫真

偶寄

閒情停綠綺應知高韻薄烏紗

烏紗本是無情物雲友句

秋娘憔悴雙

眸鳳寒女蕭閒兩鬢鴉珍重蒙泉好山水愜心竟許換名

花

題楊雲友林天素兩女士小影

雲友名慧林錢唐人天素名雪圃人皆前明湖上
女士並通文翰解音律尤精繪事皖人汪然明供
養之雲友死然明葬之智果寺西有花飛淨土香
埋骨烟暝寒林畫入禪句並於寺中建雲龕祀之
雲友死天素寂處無俚然明因送之歸闕見然明
春星堂集此幀爲謝彬寫像藍瑛寫圖

桐陰夜碧秋如水紙上香魂呼欲起明粧盛鬢兩嬋娟門
外西湖比西子對面青山學黛眉畫簾不捲雨絲絲斷橋
衰柳蘆中雁一樣才名女畫師雲友有斷橋烟柳小景天素工畫蘆雁夜鳥
啞啞啼金井水絲雪竹如秋冷同肯周助擅丹青畫屏寫
出娥媞影靡蕪如雪玉成烟早逝楊娃定可憐玉梅萬樹

雲龕外蕭寺西頭有墓田武彝九曲青山路玉人寂寞思
歸去日暮琵琶急雪飛離情最是孤山樹披圖惆悵話朝
雲更憶埋香蘇小墳解爲秋娘惜憔悴桃花潭水爾何人
爲楊雲友脩墓作

何處葬雲鬟明波翠黛間旁鄰瑪瑙寺遙對鳳凰山湖水
凝粧鏡林花想玉顏雲龕遺墨在殘照寫荆關

西湖三女士墓詩

得隙地於孤山巢居閣西爲菊香小青兩女士脩
墓並建蘭因館上爲夕陽花影樓左爲綠陰西閣
以祀小青右爲秋芳閣以祀菊香先是爲雲友脩
墓智果寺西因以附祀秋芳閣中詩以記事

巢居閣畔好青山，花落花開弔玉顏。
曾築春泥啣燕子，再營香塚葬雲鬟。
殘霞留照明粧靚，夜月招魂翠袖閒。
添種寒梅三百樹，采鸞應共鶴飛還。

冷翠零膏易斷腸，美人回首尙明粧。
自胎蓮性孤聽雨，甘證蘭因任隕霜。
三竺鐘聲尋夢迹，兩隄雲影動湖光。
遺墳重築樓重建，一樹桃花寫夕陽。

兩朝閨閣話音塵，一樣嬋娟舊隱淪。
芳姓偶同楊妹子，小名應喚菊夫人。
寒梅伴侶林花發，智果因緣墓草新。
日暮傳芳歌楚些，隔湖相望水鱗鱗。

蘆菴一角水仙祠，梅嶼三臺玉女碑。
畫裏佩環生紫夢，簫鼓葬西施。
湖山跌宕春留影，花月沈吟髻有絲。
曹妙

清樓荷桃墓重來還擬賦新詩

湖山春社兩廡花神塑像艷麗翩翩招之欲下爲湖
上一絕近以屋宇傾圮金翠陁剝非復舊觀嗟紅粉
之長埋感綠雲之易逝因賦此詩約同志者重脩焉
疑是襄王夢裏逢瑤姬巫峽暮雲重霞裾粉褪輕塵暗翠
袖香銷斷薛封退相華鬢天女市招魂眉黛美人峯匆匆
彈指神仙劫會見金丹換玉容

紅相山莊莫仲瞿雲門殯所擬爲營葬書寄善才

美人名士證人天華屋山邱感墓田憑弔玉棺還此地經
營香塚定何年虎山夢短寒淒月鶴市魂歸冷化煙牘有
霜前紅柏在虛堂灑淚一淒然

孤山弔紫雲

紫雲馮姓揚州人小青女弟會稽馬髦伯姬姿才
絕世既精書史兼達禪宗惜與小青俱早沒著有
妙山樓集見髦伯所撰紀事略及吳道新紫雲歌
歌中有云西湖烟水西冷樹小桃花繞斜陽暮寒
食東風哭杜鵑雙鴛塚傍蘇卿墓則亦葬孤山也
靚服明粧弔美人雙鬟女弟亦無倫廣陵散絕雲翳月文
字禪深雨洗塵鈿閣香魂招石笥鏡湖春夢證蘭因鶴亭
西去鴛鴦塚桃葉桃根總比鄰

松壺子歌寄錢叔美

萬松飛翠香滿湖碧雲四合壺公壺壺中風景人間無月

華滿地濃陰鋪松腴芳潤松花細松雲縹緲松霞麗哦松
蕭間飲松醉撫松盤桓抱松睡松間有樓亦有閣松下有
猿亦有鶴前生應是費長房不采華芝採靈藥三絕畫書
詩一身仙佛隱華陽客去聽吹笙君舊居陶谷嵩嶽人來譚貨
畚近客中州冰壺貯花留遠馨玉壺買春觴酒星松壺祇傍青
山青中央明鏡環蒼屏如花玉女嬌娉婷飛來胡蝶花冥
冥他年我亦壺中住來向松根斲茯苓

西泠懷古

秦亭山懷張祖望

祖望名綱孫一名丹字秦亭錢唐人與陸麗京毛稚黃柴虎臣

陳際叔沈去矜丁飛濤吳錦雯孫宇台虞景明諸人齊名稱西泠十子有是野堂集秦亭山在樓霞

嶺後法華之分

支卽西溪也

秦亭山下古西溪路轉西湖更向西水漲夏陂花鴨泛雨
昏春塹竹雞啼撈蝦淺渚三層籬斷筍深林一尺泥我亦
漁莊面秋雪一峯寒翠白雲低

東園懷張卿子

卿子名遂辰一字相期號西農居東城隱於醫詩格澄澹有野花詩

人稱張野花著有白下湖上蓬宅衰晚四編

解向東京記夢華隱君門外有烟霞微霜茅屋鳴殘葉細
雨林塘濕野花賣藥韓康仍入市著書潘閬久移家至今

小巷名猶在城曲疎林噪晚鴉

今猶名張卿子巷

高雲閣懷莫雲卿

雲卿名如錄與明雲同莫是隴同字毛稚黃贈詩所謂昔字雲

卿者君其伯仲間是也家東園有高雲閣境極清曠與憚壽平友善恒廡閣上

短垣翠薜見層樓澹抹微雲檻外收水鶴露深遙怨夜涼

蜚烟暝暗吟秋岸
離冷浸星千點池
柳疎懸月一鉤爲
問東園草衣客
北山苔破幾番遊

城曲茅堂懷藍田叔

田叔名瑛杭州人善畫山水家東城自號東臯蛻叟又號

東郭老農榜所居曰城曲茅堂子深字謝青爲諸生亦以畫名龔衡圖城曲茅堂感舊句云病葉黃堆徑寒流

綠映門

萬壑千巖寫不休
東臯細路抱城幽
徑飄落葉黃堆晚
門掩寒塘綠浸秋
蝶夢舊尋微雨榭
燕梁空語夕陽樓
章侯畫派君家出
一穗疎紅冷白鷗

東里懷洪昉思

昉思名昇字穉畦居慶春門少負才名工院本作長生殿傳奇以

國忌日貴人即演此爲言官所劾逐歸朱竹垞贈詩所謂海內詩家洪玉父禁中樂府柳屯田是也著柳畦詩集

絕代才人筆一枝開元遺事譜新詞洞天雲海陳鴻傳鈿
合金釵白傅詩潦倒名場衫潑墨蒼茫宦海髻添絲秋風
昨夜梧桐雨顧曲周郎感酒卮

飛來峯懷丁龍泓

龍泓名敬博學隱居遂于金石

之有硯林詩集湖上龍泓有二一龍泓澗在風篁嶺一龍泓洞在飛來峯唐丁隱居翰之憩館在焉君之所取名也

一徑青林響碧湍龍泓處士古丁蘭野猿聽梵凡心靜老
鶴棲烟瘦骨寒古墓空山高菊礪幽居臨水散花灘遺書
枉付中郎女多恐年深蠹簡殘

稽留峯懷金壽門

壽門名農工書善畫皆非唐以後人所及亦工詩有冬心先生

集自稱稽留山民稽留峯在下天竺許由隱處也

雲山水墨渲吳綾半生浪跡蒼巖藤書疑病梨瘦在骨詩
若老蛟寒可督小紅暖進竹葉酒澹墨冷寫梅花燈晚年
畫佛便皈佛心出家菴粥飯僧

江上懷吳西林

西林名頴芳博學著書
隱居江干有西林詩集

一徑春風藥草香草堂蘿壁動江光三更潮上琴書靜五
月風來枕簟涼避地世偏尋許邁逃名人尙識韓康玉厨
山色青如許指點錢塘石路長

樊榭山房懷厲太鴻

太鴻名鶚博學工詩尤善填
詞以孝廉舉宏博報罷輯遠

史拾遺與同人爲南宋雜事詩所著樊榭山房
詩文孤冷幽雋詩品最高學者宗之稱浙派焉

餐霞漱雪共蕭閒吟入西溪第幾灣月上芳魂招翠黛花
間殘墨譜雲鬢空池烟閣鷗相語落葉風廊鶴未還重訪

南湖舊詞隱碧蘿和雨掩柴關

米山堂懷王淡檐

王謩徵名曾祥工古文有茨檐詩文集杭蕙浦諸人皆所推服

生平行不由徑居北郭顏所居曰靜便館半道紅

陳氏米山堂有狹街撤去始就之有移居乞食圖

義橋村學圖

當年老輩幾鷗盟一代高人有盛名抱樸移家總仙跡淵明乞食亦閒情郊居圖畫黃公望村塾兒童吾子行枯樹灣頭詩弟子遺書何處問生平

何春渚其弟子也

南屏懷吳慶百

慶百名農祥著錄甚富今皆不傳聞駢體文舊藏隨園求之不得

隱君孤抱托烟霞手著新書成一家老築草堂就松樹自營生壙種梅花古臺琴韻招歸鶴鄰寺鐘聲散暮鴉便欲重題高士隴太初遺趾石林斜

黃雪山房懷徐紫珊

紫珊名逢吉居清波門外著黃雪山房詩鈔

黃葉隨風作雪飛
隱君門巷舊荆扉
一林烟暝鴉聲亂
三徑苔荒鶴跡稀
細雨吹烟迷曉榻
夕陽和影上秋衣
分明仙姥墩前路
何處漁竿舊釣磯

自度航懷陸起潛

起潛名飛仁和人善畫於西湖置畫舫曰自度航若襄陽畫畫

舫焉工詩有後飲齋集

泛宅浮家任意遊
筆牀茶竈儘風流
梅花開處停青雀
蓮葉香中玩白鷗
儘許琴僧閒結伴
始知漁隱勝封侯
天隨子與元真子
隱逸神仙孰與儔

湖墅懷華秋岳

秋岳名崑崙號新羅山人善寫生家有小園蒔花藥畜蟲鳥觀其生趣

以爲畫稿蓋以自然爲師也亦工山水今杭人多傳其畫派

秋岳丹青妙絕倫
草蟲花鳥各精神
風雲月露原多態
飲啄飛鳴各寫真
北郭園林皆入畫
西湖山水本無塵
陸耶已逝聘嘉
徐生老桐華
屈指而今少替人

錢唐懷倪魯玉

魯玉名璠錢唐人著神州古史考今所刊者杭州一郡九邑耳於湖

山文獻

尤詳

神州古史有遺編
合與桑鄴注並傳
江水解分吳越地
雲山猶識漢唐年
標竒二寺雙峯外
懷古三塘六井前
秦纜禹航何處是
累人吟嘯夕陽天

吉羅菴懷蔣山堂

山堂名仁號吉羅居士署所居曰吉羅菴工書善鍊筆居艮山

門郭外近沙河塘破樓數椽不蔽風雨
隱操高深妻孥宴然人比之龐公鹿門

龐公彷彿鹿門居
借隱妻孥樂有餘
葉落空廊烟暝後
蒼

深幽徑月來初濕雲破壁三升墨急雨危樓萬卷書今日
沙河塘上望更無人識隱君廬

西泠懷舊

頻羅菴懷梁山舟學士

學士名同書相國文莊公
子也早年入詞館卽乞病

歸養望湖山者數十年工書
法名重海內有頻羅菴集

門第清華海內知書名世重伏靈芝空山未拜喬公墓別
墅應營謝傅祠蝌浴蘋池新滌硯蝸涎苔壁舊題詩百年
金石歸椽筆誰勒中郎有道碑

有正味齋懷吳穀人祭酒

祭酒名錫麒性量溫雅
如玉在璞如氣在春終

身不見喜慍之色官祭酒以母老乞
養歸工詩詞善駢體著有正味齋集

已種梅花作墓田吹笙猶聽白華篇卷中花隱兼漁隱書

襄詩仙更酒仙舊著六朝裝璜新詞三影譜鞦韆東華
殘月西冷雨短夢重溫一惘然

冬花菴懷奚鐵生

鐵生名岡號蒙泉外史工詩善書畫三絕之名見推海內性孤

介不妄交游使酒善罵人亦望而畏之汪稼門方伯屏車騎往訪將以孝廉方正徵拒不見晚遭回祿所著僅有存者同人爲刻冬花菴遺稿

一樹冬花靜掩扉鄭虔三絕世應稀詩中詠月懷清澗畫
裏看山夢翠微果熟野猿眠釣艇蘋香水鶴上漁磯分明
清閨倪高士指點雲林話落暉

菴羅菴懷高邁菴

邁菴名樹理善畫山水號湘蘿子與鐵生齊名

荒菴何處問菴羅杏館欹湖未許過四壁琴樽虛落月一
城砧杵轉斜河春風畫閣吹桃李涼雨空山長薜蘿騰有

鷺谿曾點筆扁舟花海小鷗波

冷泉亭懷宋茗香

茗香名大樽官助教謝病歸遍遊名山詩境超妙似太白歿後

人見其飲近村酒肆中蓋仙者流也

客兒亭畔易黃昏把酒來招宋玉魂詩骨高寒棲瘦鶴嘯聲清越答孤猿林間梵響流雲氣水上松陰畫月痕兩澗春淙一靈鷲坡公詩句待誰論

湖灣懷朱青湖先生

先生名彭熟於武林文獻所著南宋古迹考官殿考皆毀

於火有抱山堂詩集

小橋漁舍指湖灣落日微茫好放船翠羽穿林花氣靜魚苗吹浪水紋圓半篷疎影浮梅檻一盞寒香薦菊泉詩卷長留圖畫在抱山亭榭渺如烟

簡松草堂懷張仲雅

仲雅名雲璈熟精文選著文選學三十卷工詩有簡松草

堂集官湘潭令謝病歸晚年矍鑠著錄不休今日之魯靈光也

曾種孤山幾樹梅謝公屐齒有蒼苔偶尋白石清泉去疑是閒雲野鶴來暮雨園林秋水濶寒香籬落晚花開新詩別有瀟湘意袁趙何堪一代才

天潛小隱懷汪季懷

季懷名瑜工詩善琴並精醫理藏書最富子婦端之尊人也

彈琴擘阮古梅根本草箋成蠹簡存水榭鶴歸秋雨細山樓猿嘯暝烟昏蔦蘿蔓引仍依樹棠棣花開久閉門曙後還餘一星在解收遺集當招魂

松壺草堂懷錢叔美

叔美名杜號松壺子工書善畫似文五峯詩名松壺畫贊

神似太白余夢中知與叔
美前世同爲西湖壑菴僧

分明瘦鶴步蒼苔詩國仙人畫院才
夜月蘿軒秋影上曉
泉松澗雨聲來待移靈苑千竿竹約種巢居幾樹梅今日
壑菴還似舊青山招隱望君回

竹崦菴懷趙晉齋

晉齋名魏蒐藏
金石精於鑒古

老輩翁錢尚有無殘編猶足寶
菰蘆系承天水王孫後家
有宣和博古圖金石盟心畱善本
雲烟過眼問行厨草堂
重訪雲林閣我是西冷舊酒徒

碧溪草堂懷朱朗齋

朗齋名文藻博學能
文熟於武林掌故

萬卷圖書不下樓

瓊媛
贈句

半生蹤跡在林邱
田園雜興留新

詠京洛知交憶舊游
何處水軒灣浴鶴誰家湖墅館盟鷗

草堂一角沙河上黃葉蕭蕭暮雨秋

靈石山房懷施石樵

石樵名紹培少年以紅豆詩得名人稱紅豆詩人著靈石

山房集

空山何處問歸樵翠壁雲間宿雨消
鳳嶺月明秋弄篴鶴溪花發曉停橈
尋僧黃葉前朝寺待客青蘿別浦橋
同是怡園舊詞隱一篇紅豆話詩瓢

鶴林道院懷倪米樓

米樓名稻孫工填詞晚入鶴林道院爲道士

夢中留跡隱留名殘夢重尋夢
隱生雙髻花枝簪笠重滿身
雲影壓衣輕挂瓢石壁松陰暗
欹枕蒲團夜月明何處飛來
招野鶴幔亭仙樂聽吹笙

潛園懷屠琴隲

琴隲名倬官儀徵知縣教民種棉織布以改婦女嬉遊之習善畫工

詩有是程堂集
以病廢尤耽禪悅

甘棠聽說古真州抱病風塵我欲愁
海內公卿爭薦禰故鄉蹤跡等依劉
茶烟感舊虛廊靜蘿月談禪古寺秋
甚欲與君商出處故山猿鶴且勾留

蒹葭里懷蔣蔣村

蔣村名爛家西溪著西溪小志官孝感縣丞

一路看山入翠微烟蘿挂壁隱柴扉
引流放泊邀鷗語就樹開門待鶴歸
奇石湧雲臨水立寒泉漱雪隔花飛
知君草罷西溪志高臥烟霞久息機

翠峯閣懷李西齋

西齋名堂善填詞輯西城雜記

翠峯閣上望峩峩高臥青山狎野樵
花影隔溪人載酒月華滿地客吹簫
萬竿修竹喧秋瀑一路長松響夜潮
近與

吳門重把臂廿年離緒托詩瓢